

JA MYĪDU'UKPĪ NØKY MIDI JA PEDRO YJAAY

Ku ja Pedro tnijayi ja janchja'wibitøjk pøn tø ñawya'kxniyidi

¹ Øts idø'øn Pedro nxøw'ajtpy, øts ja Jesucristo ngudanaapy. Ja' ø tø xkexy xjats øts ya'at nøky yam nja'ay, jøts meets ndanijayi wine'enin jam muum abikyajpkøjxp mdsinaañidi, ku jam tø mgakwa'kxnidi mgajpkøjxp jøts jam tø mnøjkxti jam Ponto, jam Galacia, jam Capadocia, jam Asia jøts Bitinia.

² Tøyip meets ja Dios Teety mwi'ejxniyi jøts ku meets ja m'u'nk'atiyit sayim ja tniwinma'ayiyiñ. Yø Espíritu Santo meets ja mdabudøjküyip, jade'en'ampyts meets ja Jesucristo yja' xpaduujniyi ja'agøjxp ku ja tø myikwaajtsiyidi ja mbøky, pø adømxí nbøky ja xkubajta'am ku ja chuuñ tyajxy. Dios mjanchkunuu'kxidip jøts øy tsuj xyiknaxtit.

Ja tsinaq'yin midi awejxingøjxp nyiknajxyimp

³ Tkajxajkyim ja Dios Teety pøn ja nwindson'ajtim Jesucristo tyeety'ajtpy, ku ja xjanchpa'ayø'øyindi jøts ja jadigojk xukpaajtyin ja jujky'ajtin xemikøjxp. Xjats ja jade'en tø xja'bikyindi jøts ja xukjøp'ijxyindi amumjoojt ja'abi jujky'ajtin, kumi tø ja Jesucristo ttunjøpi ku ja y'ø'jky ku ja jadigojk pyidsimy jujky'ajtpi xemikøjxp.

⁴ Paty tu'ugyi njøp'ejxin jøts ku ja Dios ja myaay xmø'øyim, pø tøxi ja t'a'ejxi jap tsajpjøtpy pøni ti ja xmøøwya'animp midi tum øy, midi nisa kajajtp.

⁵ Jøts kumi m'ajot'ajtpy meets Dios amumjoojt, jade'ents meets ja myøk'ajtin ja mdabudøkiiyi kunim meets ja jujky'ajtin xtyimbyaatt midi xemikøjxp, jøts jaanim ja tnanky'ejxit wiingyubety ti jaty ja jap tø t'a'ejxi.

⁶ Paty meets idø'øn ejtni xoni m'ett øy idø'øn ixyam xjanchjagu'ayo'ombaadiidi yø'øbi winmaa'ñ.

⁷ Nayide'enxi dø'øn ndamija'gyukin ja m'ajot'ajtindi sam ja oori: kuwanimxi net ja jawyeen y'atswidø'øty winets ja yik'ijxñim pøni janchtyimy'øbyujx idø'øn ja'. Nayide'ents ku ja janchja'win møk nmøøt'ajtin ku ja tmimajadakixy ja ayo'on pøni sa ndyimyjagujajta'am ja øwysinmaa'ñ, ja'ats idø'øn jawaani tyimy'øy pø ka'axi ja jade'en wyindigøøy sam oori. Jade'en meets ja mjanchja'win yikmøk'ixy ku xmidanaagyøxtit ja ayo'on, ja'ats mee myiktagupøkp, nay ja'ats mee myiktawindsø'øgip myiktamøja'wip jam nwindsøn'ajtim wyingujkp ku ja jadigojk ñankñigaxø'øgiyt.

⁸ Mwampy mdsøjkpy meets ja nwindsøn'ajtim Jesucristo, m'ajot'ajtpxi meets ja' øy meets ja xjaga'ijxñim, patyts meets xmøøt'aty ja kunuu'kxin,

⁹ jøts ku xnijawidi ku ñitso'ok'atti ja m'anmija'windi xemikøjxp; jats idø'øn m'ajot'ajtin tyundi, jade'en idø'øn ja wyingaxi'iky.

¹⁰ Tøyip Dios Teety kyugajpxy tpamaydi tpadajti yø'øbi nitsoojkin ayuujk, jøts tnigajpxti jøts ku

meets Dios y'ø'y'ajtingøjxp mmo'owa'añiyim yø yjade'embì.

¹¹ Ja Espíritu Santo midì ja Cristo tkajxp, ja' ja kugajpxy ttukmadoojidøø sà jaty ja Cristo yiknitsokpi wyinaty yjatwa'añ ku ja y'ayo'ombaatt, jøts sà nayide'en yikwindsø'øgit yikwinjawit. Ja'ats ja nugo pyamaadyip pyadajtip ja tyimy'ukpøn idø'øn ja' jøts juunim idø'øn ja yjatyimy'ukme'ent ku ja Espíritu Santo ja jade'en tyukmadøyi.

¹² Ku ja Espíritu Santo ja jade'en tyukmadøyi jøts ku ja ka' tpaattit t'ejxtit midì wyinaty ttunwajnip, adømnimts inet ja icyam nbaajtyim n'ijxyim jøts ja myiktukmadowdi ja nitsoojkin ayuujk nayide'en sà jaty ja Espíritu Santo ja tø tyuknijawiyidi pøn jaty kajpxwa'kxtip jøts ku dø'øn ja jade'en tø yjaty. Ankilis paat ja tjantyimy'ejxwa'andi tjantyimñijawiwya'andi sudso'ampy adøm nnitso'ok'ajtyindi.

Xwaadso'ojimp ja Dios jøts ja ndsinaa'yin wa'ats tsuj nyiknajxint

¹³ Paty øy jawyeen xwinma'adyit ku ti xunwa'andit, kidi møj kamøj o ti xjawidi, jade'ents mdsinaa'yin øy xyikyø'ødyit. Amumjoojt meets ja Dios y'ø'y'ajtin ja kyunuu'kxin xjöp'ejxidit midì ja yakwampy ku nwindson'ajtim Jesucristo mye'ent jadigojk.

¹⁴ Madowdi, jade'en mmado'odit sam jaay y'u'nk myimadøyin. Kidi jade'en m'uktsinaañidi sà y'ijty mga'øchøøniidi ku Dios wyinaty ka'anìm xpabøjkidi ja yja'.

15 Øy tsuj mjaa'y'attit jøts jade'en x'aduunaxtit ja Dios Teety wya'ats'ajtin y'øy'ajtin, pøn idø'øn tø mwi'ijxyidi;

16 pø yide'enxi jap nøkyijxpy wya'añ: “Øy tsuj mjaa'y'attit sam øtsin, kumi ka' ø nbøkmyøødi.”

17 Pøni mdeetyja'wip meets ja Dios Teety, windsø'øgip meets idø'øn ja ejtp, pø ja'axi ka'pxy tiidyu'ump sa pønjabøn ja chinaa'yin tyikyø'øy, ka' pøn ja tiidyu'unin tkapaatt.

18 Jabi ja Dios Teetxyi meets tø mduknitso'ok'atyidi ja ka'øchinaa'yin midi adøm ja n'apteety'amøj tø tpamendi tpabatti; mnija'widipts wa'ats jøts kidi oorip platip ja yiktaguyajkip, windigøy'ejtpxi yø'.

19 Ja' ja yiktaguyakii'ñ ku ja nwindson'ajtim jade'en wyidsuñ wyidajxy, øy ja niti pøky tjagamøødi sam ja borreeg'u'nk y'ijty yiktamiyøxy ja Dios Teety.

20 Windi'ixyip ja tanibiktaagi y'ejtnei, namga'anim ja naxwii'ñit cho'onnda'aky, xjats ja yamnim tø myiñ ku kyøjxwa'añ ja naxwii'ñit jøts ja xa'ødyøkidit ma ja Dios Teety.

21 Ja nwindson'ajtingøjxp meets ja Dios Teety xpabiky midi tø tyikjujkpyiky jadigojk xemikøjxp; jade'en'ampy ja tø tmø'øy ja myøk'ajtin, ja kyutujk, jøts ja njanchja'win amumjoojt, jøts tu'ugyi njøp'ejx'ejtin ja Dios.

22 Jade'ents ja m'anmija'win wa'ats y'etti ku ja Dios tyiy'ajtin xmimadojidi midi ja Espíritu Santo xuknija'windip. Jade'en'ampyts mnabya'ayowidit, tsokti, wa'andi ja mmigu'uk sa Dios ttsøkyin.

23 Jade'en idø'øñ tpaaty, tø meets jadigojk mga'axigach, ka' meets ja ñamyayi x'ukteety'ajtñi ja jaa'y midi oo'ktip tigøødyip, ja Dios meets ja kyajpxy tø myikjujky'atigachidi midi nijuuni sa kajajtp.

24 Kumi nømp ja':

Jade'en idø'øñ naxwii'ñit jaa'dyi sam o ti ujtsin, jøts ja tyunk jade'en sam ujtspijy midi ja tyikniğaxø'kp.

Paty tuki'iyi wyindigøy, ti ti uktamp ku ujts tyi'ich, pø nayide'enxi ja pyijy wyindigøy;

25 jøts kuts ja Dios ja kyajpxy, ejtp ja xemikøjxp, ka'ap ja kyudigøy.

Yø øgyajpxy yø ømyadya'aky mee myiktukmadoop.

2

1 Paty x'ixmatsttit tuki'iyi ja mga'ødyu'unindi, ja mga'øwyyinma'andyi, wine'en mw'in'øø'ndi, wine'en o ti mnadyawindaay'atyidi, wine'en x'ama'at'atti, xka'ødyejti, xka'øbyikta'akti pøngapøn.

2 Nayide'en sam tu'uk ja maxu'nk ñamgaxi'iky jøts ja chetsk tsojk mabaadyim tpaatwa'añ, jade'ents meets idø'øñ xtsoktit ja Dios kyajpxy y'ayuujk, midi øy midi wa'ats, jøts jade'en ja mjanchja'win myiweni'adø'øtsttit, jøts ja nitso'ok'ajtin xpaattit,

3 pøni tødam idø'øñ xjanchnijawidi ku ja nwindsøn'ajtim yja' y'øyi.

Ja Cristo dø'øñ ja xemikøjxpit jujky'ajtin tyajkp

4 Mbaattip m'ejxtip ja nwindsøn'ajtim Jesús, yø' xyikjujky'ajtimp xemikøjxp, jade'en ja myøk'ajtin tjagyepy ejxim tu'uk ja jønts tsaajin. Jats may pøn

tkatsojkip pøn tkaja'gyukip, tøts ja Dios Teety yø twi'ixy jade'en ejxim ja pojtspi ja øybi tsaa twi'ixy midi yiktunwampy.

⁵ Nayide'en meets sam ja pojtspi ja øybi tsaa twi'ixy midi yiktumpy ku tsaptøjk tyik'øyi. Jade'ents meets ja Dios Teety myiktunwa'añiyi jøts xpaduujnidit ja yja' ku ja amuum mnadyamiyoxidit jøts ku nayide'en ja mbikta'aky xamiyoxtit, ja' idø'øn ja jade'en mdawindsø'øgidip, jøts ja Dios Teety xkupøjkindit ku jade'en ndu'unindit Jesucristo køjxp.

⁶ Paty ja Dios kyajpxy wya'añ:

Nbiktakpy øts jam Sion jade'en tu'uk ja ejxpajt ejxim ja tsaa ma pøch cho'onda'aky, tu'ugyits ja yikpa'ext jade'en; pøn ja tpadump jade'en, ka'ap ja wyinguwopi yjøpkuwopi, pyaatp ja øy'ajtjn ja'.

⁷ Pøn yø tmøja'wip tjanchja'wip, møj yø', yø' xyiknitso'ok'ajtim; pønts tkamøjpiktakp, pøn tka-janchja'wip jatyi, jatpts idø'øn ja yide'en sam ja Dios kyajpxy wya'añ:

Ja tsaa midi ja pojtspi kya'a'ejxip tyiktunwa'añ, ja'ats ne'egi ja Dios tø t'a'ejxi jøts ja ne'egi yikxon tyiktuñ.

⁸ Xjats nayide'en ja Dios kyajpxy wya'añ:

Jade'en yø', ejxim tu'uk ja tsaa midi ja jaa'y tyagidaapy.

Jade'en yø yjatti wyinguwopidi yjøpkuwopidi ku tkabadundi ja øy ayuujk midi ñigajpxy ja nwindson'ajtim yja'; jade'en ja Dios tø ttanibiktaagi jøts jade'en yjattit.

Pøn ja Dios ja'ajtiyidip

9 Tum ja' meets pøn ja Dios tø wyi'ijxyidi, meets mmidumpy ja nwindson'ajtim Jesucristo yja', jade'ents meets wa'ats mjaa'y'atti jøts tu'ugyi ja Dios mja'atyidi pøn ñiwindson'ajtpy ja tsajpjotpit jøts naxwii'ñit, ja'agøjxp jade'en tø myikwi'ejxti jøts xkajpxwa'kxtit xkajpxyø'ødyit sa ja Dios janch øy janch møj. Nay ja'ats ojts øy tsuj myikujajtaajkidi myikudø'kxaajkidi ku y'ijty m'etti agootstujpy.

10 Ka'ap meets ja Dios y'ijty m'u'nk'atyidi, ixyamts meets ja mja'ajtniyidi. Ka'ap y'ijty pøn mba'ayøyi, mba'ayojidipts ja Dios ixyam.

Yikxon xpadu'undit ja Dios

11 Meets migu'uktøjk, tøg'ayø'øbyi adøm n'ijtyindi ya, tsajpjøtpy adøm ngugajp'ajtyindi xemikøjxp paty mee møk nminuu'kxa'aky, kidi xyikmajada'akti ja ka'øyjaa'y'ajtin midit tmimada'akwamp winjaa windsojk ja anmija'win.

12 Jagyapti ja tuda'aky'ajtin ja øyjaa'y'ajtin ma pøn ja Dios tkanijawinim. O meets ja wine'en mjabagajpxyidi jøts mee myiktijy ka'øyjaa'dyi, kuts t'ejxti ku tnijawidi ku tsuj mjaa'y'atti winets ja Dios ja twindsø'øgidi twinjawidi jøts jade'en ja nitso'ok'ajtin tpaattit ku wyinaty ja tiidyu'unin xøøw yja'aty.

13 Ja nwindson'ajtim Jesús køjxp xkupøktit xmimado'odit ja kudunktøjk jøts ja møj windsøn,

14 jøts ja tyumbi nayide'en midit tpayø'øpy ja tundigøøbyidi ja kajpxigøøbyidi, midit's øyjaa'y'ajttip tuda'akyjaa'y'ajttip, ja'ats y'øyja'wip.

15 Jade'ents ttsøky ja Dios jøts øy tsuj mjaa'y'attit jøts jade'en xyik'amo'ondit pøn nugo agubojidip, pøn tkanija'widip.

16 Tø meets ja øy'ajtin myikmøøñidi, jøts ka' ti nugo ajawī mmimajada'agidit. Ka' mwa'andit jøts øy sagasa m'adøøtsnidit ku ja øy'ajtin tø xpaatti. Ja' tu'ugyi mbadu'undip midi ja Dios ñi'ane'empy.

17 Windsø'øgidi winjawidi niduki'iyi sam pyaat'atyin. Tsokti ja mmigu'uktøjkti pøn nay ja'abi janchja'win pyadundip midi meets, windsø'øgidi winjawidi ja Dios, jøts nayide'en ja windsøndøjk kudunktøjk.

Ja ejxpajt midi ja Cristo tø xmø'øyim ku y'ayo'ombaaty

18 Tumbitøjkti, kajpxkyupøjkkøjxti niti jot'aka ja mwindsøndi, wan tja'awa'anidi tka'awa'anidi, wan ja tja'gyukidi tkaja'gyukidi.

19 Jabi øyxi ja' ku ja Dios tuki'iyi xamijawidit ja m'ayo'on ku myikjemandi myiktedundi niti pøkyøjxp, paty ja amgujk jotkujk xmīdanidit.

20 Ku meets xku'ayo'ombaattit o ti o ma øy tsuj tø xkayik'øyidi, ¿ti øy'ajtin meets idø'øn mdsaaçpaatp? Kuts meets øy tø mjatuñ jøts kuwañim myik'ayo'ombaadyidi pøn m'ana'amidip, ya'at idø'øn ja Dios y'øyja'wip ku meets tuda'agyī xkupiky'aty ja ayo'on.

21 Paty meets ja Dios tø mwaadsøyidi, jabi tøxi Cristo y'ejxpajt tyiktañ ku y'ayo'ombaaty niti akikøjxp jøts meets ja xpadu'undit jade'en.

22 Niti pøky ja tkatuñ, niwindem xøøw ja jaa'y ja tkawindaay'ajty;

²³ ku ja y'ijty yikmi'akikajpxy, ka'ap ja nayide'en y'adsøy; ku ja y'ijty tyik'ayo'ombaatti, ka'ap ja tmidsepiky pøn jade'en tuujnidip. Dios Teety ja ne'egi tyanipijky ja ka'pxy tiidyunk.

²⁴ Kò'øm idø'øn ja Cristo adøm ja nbøky tuki'iyi tku'o'jkigyijxy jam kruskøjxp, jøts ka'ap adøm nyikmøj'ajntint ja nbøky jøts jade'en øy tiy ja ndsinaa'yin nyiknajxint. Pyaajt ja tsaachi'ajntin ja', jøts adøm jade'en nnitsoojkindit.

²⁵ Jabi jade'enxi y'ijty sam ja borreegi tyigøyin, tøts meets jadigojk xniwimbity ja nwindson'ajntim Jesucristo pøn m'ejx'ejtidiip jøts pøn ttunk'ajtp ja m'anmija'windi.

3

Sa dø'øn pyaat'aty chøonidit ja amajtsk jaay

¹⁻² Jade'en meets tø'øxyøjkti, kajpxkyupøkti ja mgø'ømniyaa'dyi jøts xuk'ejxtit xuknijawidit ja tiy'ajntin ku meets ja mjaa'y'ajntin tuda'aky xyiknaxy. Jats idø'øn winaagin ja yaa'dyøjkti pøn tk-agupøjktipnim ja øgyajpxy ja ømyadya'aky, ja'ayi meets ja jade'en xukupøktit mjaa'y'ajtingøjxp, niti kajpxy niti madya'aky.

³ Jøts ka'ap meets ja mdsuj'ajntin xmiijatt xmi'lookt midi ja'ayi nikijxy kaxø'kp ku tum ja oori, tum ja wimbatjaaxy wimbatwøøky, jøts tum ja tsowibi wet xjotmay'attit.

⁴ Jabi wa' tsuj'ajntinxi meets idø'øn ne'egi myiktu'ump midi m'am mjoojtp yik'øyjaa'y'ajtp, ja'abi midi kawindigøøpy. Janch øy ñaxy idø'øn ja jam Dios wyingujkp.

5 Jade'ents idø'øn y'ijtyip ñajxmi ja tø'øxyøjkti pøn ja Dios yja' tpadundip ku ja nayide'en tmøøt'ajtti ja tuda'aky chinaa'yin. Yjanchja'widip idø'øn ja Dios ja y'ijty jøts ja ñiyaa'y tuki'iyi tkajpxkyupøjkidi nayide'en.

6 Jade'ents idø'øn ja Sara yjaa'y'ajty, tuki'iyi tkajpxkyupøjkijxy ja ñiyaa'y Abraham, jade'en ja tpikta'aky sam tu'uk møj øy windsøn. Pøni øy meets mjaa'y'aty, nayide'ents meets idø'øn xu'unt sam ja Sara tø tjøptuni jøts jade'en ja mniyaa'y xkatsø'øgidit.

7 Nayide'en meets yaa'dyøjkmi, ja'gyukidi ja mnidø'øxyi, windsø'øgidit sam ja pyaat'atyidi. Kidi meets ja xamøj'aty ku ja nayide'en kyamøkidi sa meets, jabi nay ja'abi øchinaa'yinxidø'øn ja Dios tø myø'øyidi midi meets tø xpaaty y'øy'ajtingøjxp. Tundi jade'en, jøts ka'ap ja Dios mgamo'ojidit midi jaty m'amidoodip mbøktsoodip.

Ku ja øy'ajtin yiku'ayo'ombaadi

8 Jade'ents idø'øn xyiknaxtit ja mdsinaa'yin: øy tsuj mnachokidit sam tu'uk jaa'yin, nabya'ayowidi nixem niyam jøts xyiknigaxø'øktit jade'en ja mduda'aky'ajtin.

9 Kidi meets ja kya'øybi nayide'en xyikwimbity jøts ja mmigu'uk xuk'ayojwya'andi ja ka'øgyajpxy ja ka'øy'ayuujk. Ni'amidowip meets idø'øn ja ne'egi ja kyunuu'kxin, pø ja'axi adøm tø nyiktaniwaaðsøø'yim jøts ja Dios kyunuu'kxin nbaajtindit.

10 Jabi yide'enxi dø'øn ja Salmos wya'añ: Pøni pøn idø'øn øy tsuj ja xøøw ja tsinaa'yin yiknaxwampy,

y'ejx'etp idø'øñ ja tyoojts ja', jøts ja yigaappi
y'axøøkpi ja tkakajpxt
jøts ja y'aaw tkadataay'att.

¹¹ Paat'ajtp idø'øñ ja t'ixmatst ja yigaappi jøts ja
y'øybi chujpi tpadu'unt ne'egi,
y'ixa'ap idø'øñ ja øy'ajtin jøts tuki'iyi tpanøjkxt.

¹² Jabi Dios Teetxyi idø'øñ t'ejx'ejtp pøn øy
jaa'y'ajttip
jøts nay ja' tmado'op ja tsapkajpxy,
ka'ats idø'øñ ja møøt ñamyayi pøn ja y'axøøkpi yi-
gaappi yikmajadaktip.

¹³ ¿Pønts meets idø'øñ ndejint
mdamidsepwa'aniiyidip ku ja y'øybi chujpi
xunwan'ettit?

¹⁴ Pøni jats pøn wyinaty mjanch-
tuku'ayo'ombaadiyidi ku ja y'øybi xjatu'undit,
øyjawiidi kunuu'kxyjawiidi meets idø'øñ ja ne'egi,
jabi møjxi ja Dios y'øy'ajtin tyikwimbejtnit. Patxyi
meets idø'øñ niti nipøn xkatsø'øgidit,

¹⁵ nadyamiyoxiyidi ja Cristo pøn adøm
nwindson'ajtyimp. Awejx'et meets idø'øñ ja',
ku pøn tyiknidøøwit tiku xpaduñ ja mjanchja'win
jade'en, ku x'adsojimbettit, tsuj tuda'aky meets
idø'øñ ja xu'unt.

¹⁶ Yikxon meets idø'øñ m'øy'att jøts xmøøt'attit
jade'en ja m'aaw ja mjoojt jotkujk, jøts ku wyinaty
pøn mdamigajpxyidi ja Cristo yjanchja'win, kø'øm
ja kyajpxy ja myadya'aky ja ttatsø'ødyu'undit ku
meets ja jade'en nugo mnitaayibyetyiyidi.

¹⁷ Øyts ja ne'egi ku ja øy'ajtin
ngu'ayo'ombaajta'ant pøni jade'endam ja Dios
kø'øm ttsøky jøts idø'øñ jade'en ne'egi ngatu'unint
ja axøøkpi ja yigaappi.

18 Jabi nayide'enxi Cristo kò'om tò y'ayo'ombaatmi adòm nbøkyøjxp, tuk'ojkyi ja tò ttanaxy ja ayo'on. Øy ja y'ijty yja'øyjaa'yì, ayo'ombaajt ja' adømgøjxp wine'en nga'øyjaa'y'ajtyindi, jøts jade'en ja Dios Teety xukwingunøjkxa'andi. O dø'øn ja ñine'kx wyindigøøy, juky'ajtpsts ja ixyam jadigojk.

19 Ja Espiritu Santo myøk'ajtin ja yiknøjkxøø mā dø'øn jap namay anmija'win t'awejxti ja y'ayo'ondi, jøts ttukmadøøy ja nitso'ok'ajtin.

20 Ya'atpi jaa'dyi ku yjuky'ajttøø ka' idø'øn ja tmøjpiktajektøø ja Dios sa ja Noé tjanigajpxy yam ja Dios ja yjanchja'awijxyidi. Ixyam idø'øn wyinaty ja Noé tyik'øyi tyik'abaadi ja møj barki mā dø'øn niwaanì ñitsokti, niduktujk idø'øn ja'adi ka'pxy pøn jap barkijøtptyi yikanaanwidejtidi ja møj nøø, jøts jade'en sa kyajajttøø.

21 Yø'øbi nøøjts ndamiguy'ejxa'amp ja nøø midi tump ku nnøbajtin midi tò xukpaajtyim ja nitso'ok'ajtin. Ka'ap ja nøbajtin ja' wya'añ jøts ja ne'kx ja'ayi wya'ats'ejtindit. Ku dø'øn nnøbajtin, ja Dios idø'øn n'amido'owimp jøts ja nbøky xyikwaajtsa'ant. Jade'en'ampyts idø'øn ja nøbajtin tyuñ jøts ja nwindsøn'ajtim xukniwaajtsim ja ka'øysi pø ja'axi ja kyujukpyøjkijy'ñ jadigojk xemikøjxp.

22 Jøts ja ojts chajpety, ojts tpu'ixaagi ja Dios Teety y'aga'ngyøj'ø'øm, ja' tniwindsøn'ajtp ja ankilistøjk jøts wine'en y'etti niduki'yì ja yikutujkpitøjkti, tum ja' amuum paajtip.

Jade'en nbadu'undit sam ja Dios ja ndunkjøøjp tømø'øyindi

¹ Tøxi ja Cristo y'ayøy, nayide'en meets idø'øn xkupiky'att ja ayo'on. Ku jade'en xu'undit tøm wyinaty ja pøky xkayikmøj'atti,

² jøts jade'en mjaaktsøønidit ya naxwiiñ sam ja Dios kø'øm ttsøky'aty, jøts ka'ap ja mgø'øm ja' xu'undit, ja kya'øbyi.

³ Tøm meets xyikjotkidakøjy jekyip ku xpadundi y'ijtyip pøn ja Dios tka'ejaxidip. Ja' y'agujkpy meets y'ijty mdsøøni ma ja axøøkpi yigaappi, ma ja awanax agojnax nayide'en xwindsø'øgidi xwinjawidi, midi idø'øn kapaat'ajtiyip nbadu'unint.

⁴ Ja'abi jaa'dyi, kumaap ja tjawidi ku meets ja xka'ukpadu'unxiniyidi ja y'axøøkpi yigaappi tsinaa'yin, paty meets myikjigajpxy myikpaga-jpxy.

⁵ Ka'ap meets ja xmøjpikta'akt, kyøyaktip ja kø'øm ja tiy'ajtin jøts ja yiktii dyu'undit, ja' ja nøjcx tii dyuujnidip pøn ttiidyump ja oo'kpi jøts ja jujkpyi.

⁶ Ja' pøn tøm y'oo'kni, tøm yiktuk'ixy yiktuknijawi sudso dø'øn ja y'anmija'win xemikøjxp ndejint y'uktsøønit møøt ja Dios. Jaayip idø'øn ja ñamyayi tpadso'ondakni ja xemikøjxpit jujky'ajtin ku ja Dios yja' tkupøjkiyidi, øy ja kawine'en yjayiktii dyundi ya naxwiiñ, tjapaatti tja'ejxti ja kajkin ja o'jkin ja'adi.

⁷ Wingonipxi jits kyudigøøgyøjxint tuki'iyi ja pikta'aky, paty meets ja y'øbyi winmaa'ñ xyiktu'undit jøts xamija'myatsidit ja Dios.

⁸ Ja tsojkin meets idø'øn ne'egi mmøøt'ajtp, jabi yajkpxyi ja maa'kxujkin ja', jøts ka'ap ja tsep ni ja

aki ja tkayikmajada'aky.

⁹ Nagyupøkidì mjønjoṭp mdøjkjoṭp, pøni pøn jam memp ja'tp, kidi ti x'ama'at'atti.

¹⁰ Kija' meets idø'øṇ xu'unt ja mdunkjøøjp sam ja Dios tø mmø'øyidi jøts jade'en mnadyabudøkiyidit nixem niyam pøni sa Dios ja kunuu'kxin køx kida'ak tø mmø'øyidi.

¹¹ Pøni jaa pøn tnigajpxwa'añ ja Dios yja', ja Dios idø'øṇ ja y'ayuujk ja wyinmaa'ñ ja yiktuujnip. Pøni jaa pøn myigu'uk tpudøkiwya'añ tuki'iyi dø'øṇ ja tyiktungøxt ja møk'ajtin midi ja Dios yajkpy. Jøts jade'en ja Dios Teety ndamøja'wa'ant ndagunuu'kxyja'wa'ant ja ndunkjøøjp nwindson'ajtim Jesucristo køjxp, pøn tu'ugyi ja øy'ajtin ja møk'ajtin tmøøt'ajtp xemikøjxp. Jade'en idø'øṇ yjatt.

Ku ja Cristo nbadu'unint, ayo'ombaajtimp

¹² Meets migu'uktøjk, kidi kuma'ayin xjawidi ku møk m'ayo'ombaatti, kidi mnømdi ku jade'en kyapaat'aty.

¹³ M'øyjawip meets idø'øṇ ne'egi ku meets idø'øṇ Cristo møøt m'ayo'ombaaty, jøts nayide'en wyinaty xaxondaṅnidit ku tnanky'ejxit ja myøj'ajtin ja y'øy'ajtin ku wyinaty myeni jadigojk.

¹⁴ Jotkujk meets idø'øṇ mnayjawiyidit ku myikwingajpxtit myikpagajpxtit Cristo køjxp; jabi ja Diosxi meets ja y'Espiritu Santo mmøøt'ajtip. Axøøk yigaap ja nwindson'ajtim ja tnimadya'akti, ka'ap meets nayide'en, ja'axi meets mwindsø'jkip mwinja'wip.

¹⁵ Møk tsø'ødyu'unin møk payø'øyin ne'egi ñaxy ku nyikjaa'y'o'jkint ku nma'jtsint, ku

tigati ndatøjka'ant ndakajpxa'ant midi'ibi adøm xkapaat'ajtimp.

¹⁶ Ka'ats ja ne'egi chø'ødyu'uni ku ja Cristo yja' ngu'ayo'ombaajta'ant. Ndamøja'wa'amp ndagunuu'kxyja'wa'amp adøm idø'øn Dios ja ne'egi.

¹⁷ Ixyam adøm idø'øn ndiidyunk tyuu'na'amp pøn jaty ja Dios ja'ajtidip. Møkts adøm ja ndiidyunk ñajxindit, ¿sats idø'øn ja yja' mye'endit kyida'aktit pøn ja Dios tkabadundip?

¹⁸ Jabi ja øyjaa'yts ja ñitsoojkin ñiyjøjxk tkapattip, ¿sats idø'øn ndejint tyimyjattit pøn ja Dios tkamimadoodip, pøn ja chinaa'yin tyiknajxtip pøky'agujkpy?

¹⁹ Patyts pøn ja Dios yja' tmi'ayo'ombaajtidip sam ja kø'øm tø tyamidsøkyidi, ka'ap ja mibaat t'ixmatstit ja y'øybi, tyun'etibyim ja'adi, amuum ja y'anmija'win ttamiyoxtit ja Dios pøn yikojidip yiktsoojkidip, nijuuni ja kyamajststu'udyidi.

5

Ku ja Cristo yjanchja'wibi yikajpxwejti

¹ Ixyam ngajpxwejwa'añ pøn jam mnigubajk'ajtiyidip, ja møjaa'dyøjkti, jabi nayja'abi tunkxi nmøøt'ajtpy, ja ku øts idø'øn kø'ømyi ndyimy'ijxy sa dø'øn ja Cristo y'ayo'ombaajty. Nbaatp øts nayide'en ja øy'ajtin sam nayide'en ja møjaa'dyøjkti, ku wyinaty ja nwindson'ajtim tø ttukmibaat'aty.

² Paty øts ixyam mee møjaa'dyøjk nnøjmidi jøts yikxon x'ejx'ettit pøn ja Dios yja' tpaduujnidip midi meets tø myiktagidøki; kø'ømdsøky idø'øn

meets ja xu'unt sam idø'øn ja Dios kø'øm ttsøky'aty, ka'ap akikøjxp jøts ni meengyøjxp ja xkatu'undit.

³ Kidi meets ja mgutujk nugo xamajada'aky, tuda'aky idø'øn ja xuu'mo'odit jøts ja m'øchinaa'yin xuk'ejxpajtin'attit.

⁴ Kuts jade'en wyinaty myeni ja møj ejx'etpi jøts meets xpøkt ja møj øy'ajtin midi niwindem xøøw ja kyudigø'øyin kaja'tp.

⁵ Ixyam meets una'jktøjkti ngajpxwejwamidi, mimadoow meets idø'øn tuki'iyi ja kyutujk ja møjaa'dyøjkti, sam meets niduknax nixem niyam mnagyupøkidit. Jabi jade'ents ja wijkyajpxy wya'añ ku ja Dios ka' ttsøky pøn kø'øm namyøjpiktajkidip, jøts ja' tpudøki y'øy'ajtingøjxp pøn tmøøt'ajtp ja tuda'aky'ajtin.

⁶ Ku xmিদုဒာ'aky'attit ja Dios myøk'ajtin, nay ja'ayi dø'øn kø'øm mgunuu'kxiyidip ku ja xøøw jumøjt wyinaty tpaaty.

⁷ Tagidøkidi ja Dios tuki'iyi midi mbamaadyip mbadajtip jabi ja'axi ja tyunk'ajtpy jøts adøm ja xtsojkont.

⁸ Nay'ejx'etidim, wijy kejy nabyikta'agidi; jabi oxí ma y'ixy kyø y ja miku', ja mmidsep pøn mduk'ixmatswajniyidip ja mjanchja'win.

⁹ Mimøk'atti, tamøk'atti ja mjanchja'win, ja'myatsti ku nayide'en ja mmigu'uktøjk y'ayo'ombatmidi o madsoo sam meets.

¹⁰ Ku adøm wyinaty tø n'uk'ayo'ombaajtyindi waani, xjats adøm idø'øn ja Dios xyik'øø'yandit jøts xmøøgyøjxindit ja møk'ajtin jøts jade'en nisa nga'ukajtnindit. Xpa'ayo'ondip idø'øn ja Dios ku kawinmaañi xkunuu'kxindi, jøts ku kø'øm tø

xwaadsø'yim jøts adøm n'ejxindit nbaajtindit ja y'ø'y'ajtin ja myøj'ajtin xemikøjxp møøt ja Jesucristo.

¹¹ Tu'ugyi dø'øn ja Dios Teety myøk'ajtin møj midi niwindem xøøw ja kyugøjx'ajtin kamemp. Jade'ents idø'øn ja yjatt.

Ja kajpxpoo'kxin midi tyagugøjxiñip

¹² Yjanchpadumpy tuda'aky'ampy ja janchja'win yø Silvano adøm nmigu'uk. İxyamts øts ja ndamigaxi tu'uk ja nøky midi tø nja'ay jøts meets ngajpxwejwa'añ jøts ku Dios kyunuu'kxin tø mmø'øyidi jøts jade'en'ampy tnanky'ijxyi pøni ti jaty tø xpaatti x'ejxti. Mdsojkidip meets ja Dios jøts kidi mibaat x'ixmatsti, tu'ugyi yikxon xpanøjkxtit.

¹³ Mdanigajxidip øts ja kajpxpoo'kxin ja Babilonia janchja'wibidi pøn ja Dios tø t'awaawmujkmi nayide'en sam meets. Nayide'en ja mgajpxpoo'kxmiyidi ja mixy Marcos midi n'u'nkja'wip pøn øts xpudøjkip.

¹⁴ Nagyajpxpoo'kxidi nixem niyam sam tu'ugyi ja jaa'y ñamyayidi Cristo chojkingøjxp.

Jade'en ø nwa'añ jøts ja øy'ajtin xmøøt'attit pøn ja nwindson'ajtim Jesucristo yja'ajtpy. Jade'ents idø'øn yjatt.

**Ja ɔgyajpxy ja ɔmyadya'aky midi xukpaajtimp
ja nitso'ok'ajtin
New Testament in Mixe, Tlahuitoltepec
(MX:mxp:Mixe, Tlahuitoltepec)**

copyright © 1987 Wycliffe Bible Translators, Inc.

Language: Mixe, Tlahuitoltepec

Translation by: Wycliffe Bible Translators, Inc.

Mixe, Tlahuitoltepec [mxp], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Tlahuitoltepec

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

422dcf73-46a5-5403-b423-8406ed76ac1d